

TENOHNOTZALISTLI



5^{pan} Nawanechikolistli Yolitilistli, Yankuitilistli iwan Tlahkuilolyektalistli ipan Nawatlahtol

30 metztli Septiembre iwan 1 metztli Octubre 2019

Inin 2019, kiwika yi 500 xiwitl opehki tlahyowilistli tlen okiwalikakeh kaxtiltekameh ipan Mesoamerika, kanin axan itoka Mexihko. Ipan 1519, Hernán Cortés iwan itlakewalwan, oahsikoh itenpan Veracruz iwan opehkeh onehnenkeh ompa tlahkotipan Mexihko. Ipan ohtli kan opanohkeh, omokah miak tlahyowilistli iwan mikilistli, tlen owehkah makuilli xiwilpilli. Axan, kolonialyotl ok nikan kah. Yeh iwan tinemih timasewalmeh, pampa ok miak techtlahyowiltiah nikan Mexihko. Ok techtlalchipachowah, iwan kinchihchikoittah tonemilis, toolocholis iwan totlahtolwan. Axan, masewalkonemeh ok moneki kiseliskeh achto, tlahko iwan weyi tlamachtlistli ika pinotlahtolli, amo ika innantlahtol. Ok kateh miakeh owihkayohmeh tlen kichiwah masewalmeh amo kiselih melahkayotl, tepahtlistli, iwan tlamachtlistli. Axan, miakeh ok kineltokah masewaltlahtolmeh iwan masewalnemilistli kateh folklor iwan amo yoltokeh. Mayeh ihkon, timasewalmeh ok nikan tikateh, timolochohktokeh iwan tomochikawaltihktokeh. Timoketzaltiah itech itlapololis kolonialyotl. Totlahtolwan yoltokeh iwan mochikawaltihktokeh okachi miak.

Ik inon, oksepa, weyi tlamachtloyan Universidad Veracruzana, iwan Universidad Veracruzana Intercultural, kinnnotzah nawatlahtohkeh, ma wallakan itech inin 5pan Nawanechikolistli, kampa okachi tikchikawaltiskeh olocholistli tlen tekipanohktokeh pampa iyolitilis, iyankuitilis iwan iyektalilis nawatlahtolli.

Ahsitilistli

Tiknekih tikpalewiskeh pampa ma monamikikan iwan mosalokan miakeh akinmeh tekipanohktokeh pampa iyolitilis, iyankuitilis iwan iyektalilis nawatlahtolli. Ihkon, tiknekih tikahsiskeh se nechikolistli weyi, patlawak, kanin tinochtin tiakih, kanin tinochtin miak topati; kanin tikyehyekoskeh tlen kikokowa totlahtol; kanin tlatlamantli nawatlahtohkeh timokakiskeh iwan tikmopatiliskeh totlayehyekol. Itech inin nechikolistli, noihki tiknekih ma kiskan sekimeh tlayehyekolmeh tlen kiyekanaskeh inin ohtli tlen tinehntokeh miakeh nawatlahtohkeh.

Ohmeh tlen kiyekanaskeh tlayehyekolli

Ika in tekipanolistli tlen okiski ipan nawi nawanechikolismeh tlen omochihkeh achto, otiknextilihkeh eyi ohmeh tlen kuantis kiyekanaskeh totlapowalis iwan totlayehyekol. Inin ohmeh iwan imixtlamachilisan kateh:

1) Tlahtolyektalilistli iwan tlahtoltlanawatilistli

Itech inin ohtli, tikteixpantiskeh tlatlamantli tlatemolistli iwan tlachiwalistli ipampa iyolitilis, iyektalilis iwan itlanawatilis totlahtol, tlen kichihtokeh miakeh tlatemohkeh, tlamachtloyahmeh iwan tekiwahkeh.

- Yankuik tlahtolmeh
- Tlahkuilolmelahkayotl
- Tekiwahtlanawatilmeh ipan totlahtol
- Tlahtolyoltlistli
(tlachiwalistli, tlamawisolli, tepostlahtolxitini, tlatzotzonalistli, iwan oksekimeh)



ANIVERSARIO
Universidad Veracruzana
1944-2019



Universidad Veracruzana
Universidad Veracruzana
Intercultural

2) Nawatemachtilistli

Itech inin ohtli, tikteixpantisket tlatlamantli tlatemolistli iwan tlachiwalistli ipampa kenin se temachtia nawatl, kemeh nantlahtolli noso kemeh okse tlahtolli. Timotlapowisket ipampa ken kinehneki totlahtol ipan tlamachtilyan. Tlapalewelistli tlen ika motemachtia.

- Nawatlamachtlistli ken L1 (nantlahtolli) iwan L2 (oksetlahtolli)
- Nawatlahtoltamachiwalistli
- Temachtihket iyektlalilis
- Formación de Profesores

3) Tlahtolkuepalistli, tlahtolpalewelistli iwan tepantlahtolistli

Itech inin ohtli, tikteixpantisket tlatemolistli iwan tlachiwalistli tlen kipalewia pampa ma monexti tlen kitzatzakuilia masewalmeh ihkuak kineki kiselisket tlapalewelistli noso tekiwahtekilistli, iwan tlen poliwi pampa ma mochiwa se kualli tlahtolkuepalistli iwan tlahtolpalewelistli.

- Itzahtzakuilis tekiwahtekilis
- Tlahtolpalewelistli kampa tlatlamantli tekiwahtekilis
- Inehnekilis teposmeh (TICs) kampa tlahtolpalewilis

Kanin mochiwas nechikolistli

Inin 5pan Nawanechikolistli mochiwas ipan Universidad Veracruzana Intercultural, Wehweyih Tepemeh, tlen mokawa ipan Barrio de Tolapa, Tequila, Veracruz, Federal Ohtli S/N.

Tlen tekitl mochiwas

Tekipanolistli tlen mochiwas ok moyektlalihtok ihkuak momachiotiah nochtin akinmeh wallaskeh. Yeh, ya se kimatih tlen tlamantli tlekitl mochiwas ipan nechikolistli:

- Tlahtolteixpantlistli magistral
- Tlahtolteixpantlistli ipampa eyi tlayekanohmeh iwan imixtlamachiliswan
- Tlahtlapowalistli
- Amoxteixpantlistli
- Tlachiwalmachtlistli
- Amapowalistli ika nawatl
- Tekipanolnechikolistli

Tlaxtlawilistli

Inin 5pan Nawanechikolistli amo motlaxtlawa. Nochtin akinmeh wallaskeh, moneki motlaxtlawisket imixkoyan kanin mokawaskeh iwan ken walmoikaskeh.

Registro de participaciones

Akin kineki kiteixpantis itlahtol, moneki kichiwas ika nawatl. Nochtin teixpantilmeh moneki tlapowaskeh ipan se ohtli tlen kiyekanas inin tlayehyekolistli. Moneki ma wehkawakan 20 pilkawitl. Titemakaskeh mawisolamatl akinmeh itlah tlahtolli kiteixpantia. Nochtin tlahtoltexipantilmeh moneki xikintitlanilikan itech inin tlatitlanilistli: csandova33@gmail.com / rnavavite@gmail.com / rafnava@uv.mx. Tikinselisket teixpantilmeh asta 13 de septiembre de 2019. Sehsen teixpantlistli, moneki kiplas se itokayo, se resumen ika 300 tlahtolmeh, iwan se curriculum, tlen kihtowa grado académico, kanin tlamachtia o kanin momachtia, idirección iwan ken se kahsis.

Tla okachi tikmatisneki

Mtro. Carlos Octavio Sandoval Arenas
csandova33@gmail.com / carsandoval@uv.mx

Dr. Rafael Nava Vite
rnavavite@gmail.com / rafnava@uv.mx

Tel. (228) 818 32 39 / 818 34 11
Tel: (55) 33 21 8585